

Monchmol hott merr die Nas voll

Als merr deetzt vor de Baustell on de Stadthall zesomme gestonne hawwe, de Karl, de Schorsch unn ich, hott uff oomol de Schorsch uff soi Uhr geguckt unn hott enn Schreck kriecht: Josses naa, hotter gerufe, ich muss joo fort, die Fraa wart uff mich, mir wolle zum Aldi. Machts gut, ihr zwaa – unn fort warer.

Will de Schorsch enn Porsche kaafe?, habb ich de Karl gefroocht.

De Karl hott mich e bisje komisch oogeguckt: Enn Porsche? Beim Aldi? De Schorsch? Ei wie kimmsden doo druff?

War e Spaßje, habb ich gesacht, nor weil ich vor e paar Daach gelese habb, dass was waaß ich wo so e Umfrooch gemacht hawwe unn doodebei iss erauskumme, dass de Aldi unn de Porsche die oogesehensde Firme in Deutschlond sinn. Hosdes aach gelese, Karl?

De Karl hott genickt: Dess habb ich aach gelese unn habb merr doodriwwer moi Gedonke gemacht. Dess heeßt doch nix onnerst, als dass die Leit sparn bei allem wasse daachdächlich zum Lewe brauche unn sich doodeferr irchendwonn was Extras leisde. Unn die Nome Aldi unn Porsche stehn debei ferrs Allgemeine unn ferrs Besondere.

Ich habb mettem Kopp gewackelt: Ich waaß nit – du glaabst also, die meisde Leit detes gonze Johr billich oikaafe unn dann uff oomol enn Haufe Geld ferr e groß Audo odder ferr e Fahrt mettem Traumschiff in die Karibik ausgewwe? Dass sies nooch all dem Sparn ab unn zu so richdisch dotze losse, moonsde dess?

Ja, gibt de Karl zur Antwort, dess denk ich hawwe die Leit, die gefroocht worrn sinn, doodemett saache wolle. Unn wennde dich umguckst dann wersde dess Prinzip iwverall feststelle, vor allem bei de junge Leit. Doo gehnse e Zeitlong iwverhaupt nit fort odder nor zum McDonald unn dann fahrnse nooch Meenz odder nooch Wissbade unn losse sich vom Kellner im Frack e Sechs-Gäng-Menü unn e Flasch Henkell Trocke ufftraache. Weil jeder Mensch hott irchentwonn die Nas voll vom Sparn unn denkt, was soll dess alles nitze, jetz werd widder emol so richdisch Geld ausgewwe ferr was Scheenes, was merr vorzeiche odder von dem merr erzähle kann, wie enn Porsche, enn Trip in die Südsee odder e gut Esse. Nor ich kann noch so vill zum Aldi gieh, enn Porsche odder e Fahrt mettem Traumschiff kennt ich merr nit leisde.

Ich habb de Karl oogeprinst: Warum dann nit? – mettem Traumschiff von de Köln-Düsseldorfer von Meenz aus in die Drosselgass, was hälsden defoo? Johrelong hocke merr dehoom erum unn gewwe koo Geld aus, mir missde mol widder so richdisch ooner druffmache in Rüdesem.

De Karl hotts gleich kapiert: Unn uns dort Porsche odder onnern steile Karosserien oogucke?

Ich habbem uff die Schulter gekloppt: Ja, awwer erst im nächsde Friejhohr, wennses Verdeck uffmache – was hälsden defoo? Ich glaab, de Schorsch det aach mettmache.

De Karl hott mettem Kopp geschittelt: Naa, Honnes, mir hawwes schunn emol probiert unn hawwes dehoom nit dorchkriecht.

Ich habb genickt: Naa, dess kriehn merr dehoom nit dorch. Also losse merrs.

De Karl war e bisje traurich: Joo, losse merrs – mir misses losse. So, unn ich geh jetz hoom zu moine Aldi.

Eiern Honnes